

摘藻堂四庫全書薈要

子部

欽定四庫全書薈要

子部

御製律呂正義後編卷一百二



詳校官主事臣陳本

欽定四庫全書薈要卷一萬一千三十八

子部

御製律呂正義後編卷一百二

樂章考十

宗廟



漢

東漢

魏

晉

宋

齊

梁

陳

北齊

周

歷代宗廟樂章

宗廟之禮尚矣夏世室殷重屋周明堂所以薦雕簋而承大禋祀典其重粵稽王制天子七廟三昭三穆與太祖之廟而七此廟之制也又曰天子蒞禘祫禘祫嘗祫烝此祭之名也古先聖王升中告虔右社稷左宗廟膺以蕭合酌以茅成敢忘崇報哉庸或去祧為壇去壇為壝不免異同而嚴禋孝饗之誠萬世一軌予以奏永安予以奏王夏登歌擊拊載諸周禮莫

或廢也爰次宗廟樂章于郊祀後明尊祖之道正大  
祭之義于是乎存上自漢唐以迄元明備採罔闕用  
以輔翼周之頌維清商之衍烈祖可也

漢宗廟樂章

高祖時叔孫通因秦樂人制宗廟樂大祝迎神於廟  
門奏嘉至皇帝入廟門奏永至乾豆上奏登歌登歌  
再終下奏休成之樂皇帝就酒東廂坐定奏永安之  
樂又有房中祠樂高祖唐山夫人所作也周有房中

樂至秦名曰壽人凡樂樂其所生禮不忘本高祖樂楚聲故房中樂楚聲也孝惠二年使樂府令夏侯寬備具簫管更名曰安世樂按嘉至永至休成永安等樂詞漢書不詳

### 漢宗廟樂章

案漢書禮樂志曰安世房中歌十七章据是即祠樂也魏文帝黃初時改為正始樂明帝太和初繆襲奏稱省讀漢安世歌高張四懸神來燕享嘉薦令儀永

受厥福往者謂房中為后妃之歌者恐失其意宜改  
曰享神歌又案宋書樂志曰王粲所造安世詩今亡  
其衆歌詩多即前代之舊然則安世詩為宗廟樂章  
自漢及魏皆然或其中分豐草女羅等章為房中樂  
亦未可定然無文明且仍其舊為漢宗廟樂章可也

安世房中歌

十七章

案劉敞曰此房中歌十七章推尋文理不見十  
七章疑本十二章誤為十七章又劉奉世曰桂



華美芳皆二詩篇名側注在前篇之末傳寫之  
誤遂以冠後今從劉敞分定十七章與郭茂倩  
樂府段落稍異崇古本也

大孝備矣休德昭清高張四縣樂充宮廷芬樹羽林雲  
景杳冥金支秀華庶旄翠旌

七始華始肅倡和聲神來宴娛庶幾是聽粥粥音送細  
齊人情忽乘青玄熙事備成清思呦呦經緯冥冥

我定歷數人告其心敕身齊戒施教申申乃立祖廟敬

明尊親大矣孝熙四極爰轅

王侯秉德其鄰翼翼顯明昭式清明鬯矣皇帝孝德竟  
全大功撫安四極

海內有姦紛亂東北詔撫成師武臣承德行樂交逆簫  
勺羣慝肅為濟哉蓋定燕國

大海蕩蕩水所歸高賢愉愉民所懷大山崔嵬殖民  
何貴貴有德

安其所樂終產樂終產世繼緒飛龍秋游上天高賢愉

樂民人

豐草萋女羅施善何如誰能回大莫大成教德長莫長  
被無極

雷震震電耀耀明德鄉治本約治本約澤洪大加被寵  
咸相保德施大世曼壽

都荔遂芳宵宸桂華孝奏天儀若日月光乘玄四龍回  
馳北行羽旄殷盛芬哉芒芒孝道隨世我署文章

桂華馮馮翼翼承天之則吾易久遠燭明四極慈惠所

愛美若休德杳杳冥冥克綽永福

美芳磴磴卽卽師象山則嗚呼孝哉按撫戎國蠻夷竭  
歡象來致福兼臨是愛終無兵革

嘉薦芳矣告靈饗矣告靈既饗德音孔臧維德之臧建  
侯之常永保天休令問不忘

皇皇鴻明蕩侯休德嘉承天和伊樂厥福在樂不荒惟  
民之則

浚則師德下民咸殖令問在舊孔容翼翼

孔容之常承帝之明下民之樂子孫保光承順溫良受  
帝之光嘉薦令芳壽考不忘

承帝明德師象山則雲施稱民永受厥福承容之常承  
帝之明下民安樂受福無疆

### 東漢宗廟樂章

案漢明帝定大予樂用之郊廟上陵者也而樂章無  
傳蓋當時郊祀即用十九章宗廟亦即用十七章特  
異其名詞不改也說見前郊祀

魏宗廟樂章

案魏武帝平劉表得漢雅樂郎杜夔夔老久不肄習所得於三百篇者惟鹿鳴騶虞伐檀文王四篇餘聲不傳今宗廟樂章與郊祀樂章皆不可考蓋文帝既受漢禪樂即承襲漢詞後明帝改漢房中歌為享神歌即此可證說見前郊祀

晉宗廟樂章

武帝受命之初百度草創禮樂權用魏儀遵周室肇

稱殷禮之義但改樂章而已夫所謂採漢魏之遺範  
覽景文之垂則鼎鼎惟新前音不改者其信然哉

晉祠廟樂歌

案晉書樂志曰武帝泰始中祠廟樂有夕牲歌迎送  
神歌七廟登歌饗神歌凡十一章傳玄造

夕牲歌

我夕我牲猗歟敬止嘉泰孔時供茲享祀神鑒厥誠博  
碩斯歆祖考降饗以虞孝孫之心

迎送神歌

嗚呼悠哉日鑒在茲以時享祀神明降之神明斯降既  
祐饗之祚我無疆受天之祐赫赫太上巍巍聖祖明明  
烈考丕承繼序

征西將軍登歌

經始宗廟神明戾止申錫無疆祇承享祀假我皇祖綏  
予孫子燕及後昆錫茲繁祉

豫章府君登歌



嘉樂在庭慶祀在堂  
皇皇宗廟乃祖先皇  
濟濟辟公相予蒸嘗  
享祀不忒降福穰穰

潁川府君登歌

於邈先后實司于天  
顯矣皇祖帝祉肇臻  
本支克昌資始開元  
惠我無疆享祀永年

京兆府君登歌

於惟曾皇顯顯令德  
高明清亮匪兢柔克  
保乂命祐基命惟則  
篤生聖祖光濟四國

宣皇帝登歌

於鑠皇祖聖德欽明勤施四方夙夜敬止載敷文教載  
揚武烈匡定社稷龔行天罰經始大業造創帝基畏天  
之命于時保之

景皇帝登歌

執競景皇克明克哲旁作穆穆惟祇惟畏纂宣之緒耆  
定厥功登此雋乂糾彼羣凶業業在位帝既勤止維天  
之命於穆不已

文皇帝登歌

於皇時晉允文文皇聰明睿智聖敬神武萬幾莫綜皇  
斯清之虎兕放命皇斯平之柔遠能邇簡授英賢創業  
垂統勲格皇天

饗神歌 二章

案傳玄云登歌歌盛德之功烈故廟異其文饗  
神猶周頌之有瞽及雍但說祭饗神明禮樂之  
盛七廟饗神皆用之又案南齊書樂志但云玄

造饗神歌二篇今肅肅在位推尋文義共有三章乃篇一而章三耳

曰晉是常享祀時序宗廟致敬禮樂具舉惟其來祭普天率土犧樽既奠清酤既載亦有和羹薦羞斯備烝烝永慕感時興思登歌奏舞神樂其和祖考來格祐我邦家敷天之下罔不休嘉

肅肅在位濟濟臣工四海來格禮儀有容鐘鼓振管絃理舞開元歌永始神胥樂兮肅肅在位臣工濟濟小大

咸敬上下有禮理管絃振鼓鐘舞象德歌詠功神胥樂  
兮肅肅在位有來雍雍穆穆天子相維辟公禮有儀樂  
有則舞象功歌詠德神胥樂兮

晉江左宗廟樂歌

案晉書樂志曰孝武帝太元中四廟金石始備增造  
宗廟歌詩凡十二章曹毗王珣等造案晉初都洛陽  
遷長安歷武帝惠帝懷帝四世至元帝都建業是為  
東晉故有江左宗廟歌云

歌高祖宣皇帝

曹毗造

於赫高祖德協靈符應運撥亂釐整天衢勲格宇宙化  
動八區肅以典刑陶以玄珠神石吐瑞靈芝自敷肇基  
天命道均唐虞

歌世宗景皇帝

曹毗造

景皇承運纂隆洪緒皇維重抗天暉再舉蠢矣二寇擾  
我揚楚乃整元戎以膏齊斧疊疊神算赫赫王旅鯨鯢  
既平功冠帝宇

歌太祖文皇帝

曹毗造

太祖齊聖王猷誕融仁教四塞天基累崇皇室多難嚴  
清紫宮威厲秋霜惠過春風平蜀夷楚以文以戎奄有  
參墟聲流無窮

歌世祖武皇帝

曹毗造

於穆武皇允龔欽明應期登禪龍飛紫庭百揆時序聽  
斷以情殊域既賓偽吳亦平晨流甘露宵映朗星野有  
擊壤路垂頌聲

歌中宗元皇帝

曹毗造

運屯百六天羅解貫元皇勃興網羅江漢仰齊七政俯  
平禍亂化若風行澤猶雨散淪光更耀金輝復煥德冠  
千載蔚有餘粲

歌肅宗明皇帝

曹毗造

明明肅祖闡洪帝祚英風夙發清暉載路姦逆縱忒罔  
式皇度躬振朱旗遂豁天步宏猷淵塞高羅雲布品物  
咸寧洪基永固



歌顯宗成皇帝

曹毗造

於休顯宗道澤玄播式宣德音暢物以和邁德蹈仁匪  
禮弗過敷以純風濯以清波連理映阜鳴鳳棲柯同規  
放勛義蓋山河

歌康皇帝

曹毗造

康皇穆穆仰嗣洪德為而不宰雅音四塞閑邪以誠鎮  
物以默威靜區宇道宣邦國

歌孝宗穆皇帝

曹毗造

孝宗夙哲休音允臧如彼晨離曜景扶桑垂訓華幄流  
潤八荒幽讚玄妙爰該典章西平僭蜀北靜舊疆高猷  
遠暢朝有遺芳

歌哀皇帝

曹毗造

於穆哀皇聖心虛遠雅好玄古大庭是踐道尚無為治  
存易簡化若風行民猶草偃雖曰登遐徽音彌闡悃悃  
雲韶盡美盡善

歌太宗簡文皇帝

王珣造

皇矣簡文於昭于天靈明若神周淡如淵冲應其來實  
與其遷疊疊心化日用不言易而有親簡而可傳觀流  
彌遠求本逾玄

歌烈宗孝武皇帝

王珣造

天鑒有晉欽哉烈宗同規文考玄默允龔威而不猛約  
而能通神鉦一震九域來同道積淮海雅頌自東氣陶  
淳露化協時雍

晉四時祠祀歌

案晉書樂志曰孝武太元中四時祠祀歌凡一章曹毗造案此篇與傳玄饗神歌同調亦一篇而分三章也

肅肅清廟巍巍聖功萬國來賓禮儀有容鐘鼓振金石  
熙宣兆祚武開基神斯樂兮理管絃有來斯和說功德  
吐清歌神斯樂兮洋洋元化潤被九壤民無不悅道無  
不往禮有儀樂有式詠九功永無極神斯樂兮

宋宗廟樂章

武帝永初朝有司奏皇朝肇建廟祀廟設雅樂王韶之所撰七廟歌辭並合施用詔可後王宏議太祝惟送神而不迎神或云廟以居神恒如在也不應有迎送之事夫立廟居靈四時致享以申孝思夫神升降無常何必恒安所處尚書曰祖考來格詩云神保馭歸此並言神有去來則有迎送明矣

### 宋七廟登歌

案宋書樂志曰武帝永初中廟樂七廟登歌七廟享

神登歌凡八章王韶之造

祠北平府君登歌

綿綿遐緒明昭載融漢德未遠堯有遺風於穆皇祖永  
世克隆本枝惟慶貽厥靡窮

祠相國掾府君登歌

乃立清廟清廟肅肅乃備禮容禮容穆穆顯允皇祖昭  
是嗣服錫茲繁祉聿懷多福

祠開封府君登歌

四縣既序簫管既舉堂獻六瑚庭萬八羽先王有典克  
禋皇祖丕顯洪烈永介休祐

祠武原府君登歌

鐘鼓喤喤威儀將將溫恭禮樂致享曾皇邁德垂仁係  
軌重光天命純嘏惠我無疆

祠東安府君登歌

鑠矣皇祖帝度其心永言配命播茲徽音思我茂猷如  
玉如金駿奔在陞是鑒是歆

祠孝皇帝登歌

烝哉孝皇齊聖廣淵發祥誕慶景祚自天德敷金石道  
被管絃有命既集徽風永宣

祠高祖武皇帝登歌

惟天有命眷求上哲赫矣聖武撫運桓撥功並敷土道  
均汝墳止戈曰武經緯稱文烏龍失紀雲火代名受終  
改物作我宋京至道惟王大業有劭降德兆民升歌清  
廟



七廟享神登歌

案此一章并作祠章太后登歌

奕奕寢廟奉璋在庭笙簧既列犧象既盈黍稷匪芳明  
祀惟馨樂具禮充潔羞薦誠神之格思介以休禎濟濟  
羣辟永觀厥成

宋世祖廟樂歌

案宋書樂志曰世祖孝武皇帝歌宣皇太后歌凡二  
章謝莊造

世祖孝武皇帝歌

帝錫二祖長世多祜於穆睿考龔聖承矩元極弛馭乾  
紐墜緒闢我皇維締我宋宇刷定四海肇構神京復禮  
輯樂散馬墮城澤羽九有化浮八瀛慶雲承掖甘露飛  
薨肅肅清廟徽徽閔宮舞蹈象德笙磬陳風黍稷非盛  
明德惟崇神其欽止降福無窮

宣皇太后歌

稟祥月輝毓德軒光嗣徽嫺汭思媚周姜母臨萬寓訓

藹紫房朱玄至籥式載瓊芳

宋章廟樂舞歌

案宋書樂志曰章廟樂舞雜歌悉同用太廟辭惟三  
后別撰賓出入奏肅成之樂牲出入奏引牲之樂薦  
豆呈毛血奏嘉薦之樂迎神奏昭夏之樂皇帝入廟  
北門奏永至之樂太祝裸地奏登歌章太后室奏章  
德凱容之樂昭太后室奏昭德凱容之樂宣太后室  
奏宣德凱容之樂皇帝還東壁受福酒奏嘉時之樂

送神奏昭夏之樂皇帝詣便殿奏休成之樂凡十五  
章其昭德凱容樂宣德凱容樂明帝造餘俱殷淡造  
賓出入奏肅成

案肅成郭茂倩樂府作肅咸

舜承孝典恭事嚴聖浹天奉賁罄壤齊慶司儀具序羽  
容夙彰芬枝颺烈黼構周張助寶奠軒酌珍充庭璆縣  
凝會涓朱竚聲先期選禮肅若有承祗對靈祉皇慶昭  
膺尊事威儀輝容昭敘迅恭神明粢盛牲俎肅肅嚴宮

藹藹崇基皇靈降祉百祇具司戒誠望夜端列承朝依  
微昭旦物色輕宵鴻慶遐邇嘉薦令芳翊帝明德永祚  
流光

牲出入奏引牲

維誠潔饗維孝奠靈敬芬黍稷敬滌犧牲騂繭在黍載  
溢載豐以承宗祀以肅皇衷蕭芳四舉華火周傳神監  
孔昭嘉是柔牲

薦豆呈毛血奏嘉薦

案宋書樂志於此章後注云右夕牲歌詞蓋賓  
出入牲出入以及薦豆呈毛血皆夕牲禮也

肇禋戒祀禮容咸舉六典飭文九司昭序牲柔既昭儀  
剛既陳恭滌惟清敬事惟神加籩再御兼俎重薦節動  
軒越聲流金縣奕奕闕幄疊疊嚴闡潔誠夕鑑端服晨  
暉聖靈戾止翊我皇則上綏四寓下洋萬國永言孝饗  
孝饗有容儉僚贊列肅肅雍雍

迎神奏韶夏

案韶夏韶字郭茂倩樂府作昭古今樂錄曰周  
禮牲出入奏昭夏齊氏仍宋儀注迎神奏昭夏  
此正迎神之曲疑韶字悞

闕宮黜黜復殿微微璇除肅炤釭壁彤輝黼帟神凝玉  
堂嚴馨園火夕耀方水朝清金枝委樹翠鐙竚縣渟波  
澄宿華漢浮天恭事既夙虔心有慕仰降皇靈俯寧休  
祚

皇帝入廟北門奏永至

案漢書禮樂志曰皇帝入廟門奏永至以為行  
步之節猶古采齊肆夏也漢永至樂詞不傳殷  
淡蓋追仿為之

皇朝鬯矣孝容以昭鑒華羽迺拂漢涵濬申申嘉夜翊  
翊休朝行金景送步玉風韶師承祀則肅對禋祧

太祝裸地奏登歌

二章

帝容承祀練時涓日九重徹闕四靈賓室肅唱函音庶  
旄委佾休靈告饗嘉薦尚芬玉瑚飾列桂簋昭陳具司



選禮翼翼振振

裸崇祀典酌恭孝時禮無爽物信靡媿辭精華孚鬯誠  
監昭通升歌翊節下管調風皇心履變敬明尊親大哉  
孝德至矣交神

章太后室奏章德凱容

幽瑞浚靈表彰嬪聖翊載徽文敷光崇慶上緯纏祥中  
維飾詠永屬輝猷聯昌景命

昭太后室奏昭德凱容

表靈躔象纘儀緯風膺華丹耀登瑞紫宮訓形霄宇武  
彰宸宮騰芬金會寫德聲容

宣太后室奏宣德凱容

天樞凝耀地紐儷輝聯光騰世炳慶翔機薰藹中寓景  
纏上微玉頌鏤德金籥傳徽

皇帝還東壁受福酒奏嘉時

禮薦洽福時昌皇聖膺嘉祐帝業凝休祥居極乘景運  
宅德瑞中王澄明臨四表精華延八鄉洞海周聲惠徹

寓麗乾光靈慶纏世祉鴻烈永無疆

送神奏昭夏

二章

大孝備盛禮豐神安留嘉樂充旋駕聳汎青穹延八虛  
闢四空藹流景肅行風

昭融教緝風度戀皇靈結深慕解羽縣輟華樹背璿除  
端玉輅流汪濊慶國步

皇帝詣便殿奏休成

案漢書禮樂志曰登歌再終下奏休成之樂美

神明既饗也漢休成樂詞不傳殷淡盖追仿為之

醴醴具登嘉俎咸薦饗洽誠陳禮周樂徧祝辭罷裸序  
容輟縣蹕動端庭鑒回嚴殿神儀駐景華漢亭虛八靈  
案衛三祗解途翠盖耀澄畢奕凝宸玉鑣息節金輅懷  
音式誠遠孝底心肅感追憑皇鑒思承淵範神錫懋祉  
四緯昭明仰福帝徽俯齊庶生

南齊宗廟樂章

建元間有司奏宗廟雅樂歌辭舊用學士撰製採擇  
又謂漢世歌篇多少無定皆稱事立文並多八句然  
後轉韻傳玄改韻頗數更傷簡節之美近世王韶之  
顏延之得賒促之中皆各三章章八句此于序述功  
業詳畧為宜詔可于是分造廟樂歌詩以備參議

### 南齊宗廟樂歌

案南齊書樂志曰建元初詔造廟樂歌詩夕牲羣臣  
出入奏肅咸之樂牲出入奏引牲之樂薦豆呈毛血

奏嘉薦之樂迎神奏昭夏之樂皇帝入廟北門奏永  
至之樂太祝裸地奏登歌皇祖廣陵丞太中大夫淮  
陰令皇曾祖即丘令皇祖太常卿五室並奏凱容之  
樂皇考宣皇帝室奏宣德凱容之樂昭皇后室奏凱  
容之樂皇帝還東壁上福酒奏永祚之樂送神奏肆  
夏之樂皇帝詣便殿奏休成之樂凡十六章謝超宗  
造案古今樂錄曰梁何佟之周捨等議以為周禮牲  
出入奏昭夏而齊氏仍宋儀注迎神奏昭夏牲出入

更奏引牲樂乃以牲牢之樂用接祖宗之靈宋季之失禮也

羣臣出入奏肅咸

絜誠底孝孝感煙霜夤儀式序肅禮綿張金華樹藻肅  
哲騰光殷殷升奏嚴嚴階庠匪椒匪玉是降是將懋分  
神衷翊祐傳昌

牲出入奏引牲

肇祀嚴靈恭禮尊國達敬敷典結孝陳則芬滌既肅犧

於既整聳誠流思端儀選景肆禮佇夜綿樂望晨崇席  
皇鑒用饗明神

薦豆呈毛血奏嘉薦

清思眴眴寢微微恭言載感肅若有希芬俎具陳嘉  
薦兼列凝馨烟颺分照星哲睿靈式降協我帝道上澄  
五緯下陶八表

迎神奏昭夏

涓辰選氣展禮恭祗重闡月洞層牖烟施載虛玉鬯載



受金枝天歌折饗雲舞磬儀神惟降止泛景凝義帝華  
永藹泯藻方摘

皇帝入廟北門奏永至

戲繇惟則姬經式序九司聯事八方承宇鑒迺靜陳縵  
樂具舉凝旒若慕傾璜載竚振振璇衛穆穆禮容載藹  
皇步式敷帝蹤

太祝裸地奏登歌

清明既鬯大孝乃熙天儀睟愴皇心儼思既芬房豆載

絜牲醑裸升禮銷玉登聲茂對幽嚴式奉徽靈以享  
以祀惟感惟誠

皇祖廣陵丞室奏凱容

國昭惟茂帝穆惟崇登祥緯遠締世景融紛綸睿緒菴  
蔚王風明進厥始濬哲文終

皇祖大中大夫室奏凱容

璇條黃蔚瓊源浚照懋矣皇烈載挺明劭永言敬思式  
恭惟教休途良乂榮光有耀

皇祖淮陰令室奏凱容

嚴宗正典崇饗肇禋九章既飾三清既陳昭恭皇祖承  
假徽神貞祐伊協卿藹是鄰

皇曾祖即丘令室奏凱容

肅惟敬祀絜事參薌環袞像綴緬密絲簧明明烈祖尚  
錫龍光粵雅于姬伊頌在商

皇祖太常卿室奏凱容

神宮懋鄴明寢昌基德凝羽綴道鬯容辭假我帝緒懿

我皇維昭大之載國齊之祺

皇考宣皇室奏宣德凱容

道闕期運義開藏用皇矣睿祖至哉攸縱循規烈照襲  
矩重芬德溢軒義道懋炎雲

昭皇后室奏凱容

月靈誕慶雲瑞開祥道茂淵柔德表徽章粹訓宸中儀  
形宙外容蹈凝華金羽傳藹

皇帝還東壁上福酒奏永祚

構宸抗宇合軫齊文萬靈載溢百禮以殷朱絃繞風翠  
羽停雲桂樽既滌瑤俎既薰升薦惟誠昭禮惟芬降祉  
遙裔集慶氤氲

送神奏肆夏

禮既升樂以愉昭序溢幽饗餘人祇鬯敬教敷神光動  
靈駕翔芬九垓鏡八鄉福無屆祚無疆

皇帝詣便殿奏休成

睿孝式鬯饗敬爰偏諦容輟序侑文靜縣辰儀聳蹕霄

衛浮鑾旒帟雲舒翠華景搏恭惟尚烈休明再纏國猷  
遠藹昌圖聿宣

南齊太廟登歌

案南齊書樂志曰太廟登歌凡二章褚淵造

惟王建國設廟凝靈月薦流典時祀暉經瞻宸僊思雨  
露追情簡日筮晷閔奠升文金壘淳桂冲幄舒薰備僚  
肅列駐景開雲

至饗攸極睿孝惇禮具物咸絜馨香合體氣昭扶幽眇

慕纏遠迎絲驚促送佾留晚聖衷踐候節改增愴妙感  
崇深英徽彌亮

南齊太廟二室樂歌

案南齊書樂志曰武帝永明二年太祖高皇帝室奏  
高德宣烈之樂穆皇后室奏穆德凱容之樂高宗明  
皇帝室奏明德凱容之樂凡三章王儉造

太祖室奏高德宣烈

悠悠草昧穆穆經綸乃文乃武乃聖乃神動龕危亂靜

比斯民誕膺休命奄有八寅握機肇運光啟禹服義滿  
天淵禮昭地軸澤靡不懷威無不肅戎夷竭歡象來致  
福偃風裁化暉日敷祥信星含曜拒草流芳七廟觀德  
六樂宣章惟先惟敬是饗是將

穆皇后室奏穆德凱容

大姒嬪周塗山儷禹我后嗣徽重規疊矩肅肅閼宮翔  
翔雲舞有饗德馨無絕終古

高宗明皇帝室奏明德凱容



多難固業殷憂啟聖帝宗纘武維時執競起柳獻祥百  
堵興詠義雖祀夏功符受命遠無不懷邇無不肅其儀  
濟濟其容穆穆赫矣君臨昭哉嗣服允王惟后膺此多  
福禮以昭事樂以感靈八簋陳室六舞充庭觀德在廟  
象德在形四海來祭萬國咸寧

梁宗廟樂章

梁氏之初樂緣齊舊武帝思洪古樂遂下詔訪以沈  
約奏答稱旨乃定郊禋宗廟樂迨普通中改諸雅歌

并謂明堂宗廟所尚者牲賓是為敬之名復有陰主之義故令同奏史稱梁雅曲合古者良有以也

梁宗廟登歌

案隋書樂志曰武帝普通中加宗廟登歌凡七章蕭子雲撰

功高禮洽道尊樂備三獻具舉百司在位誠敬罔僞幽明同致茫茫億兆無思不遂盖之如天容之如地殷兆玉筐周始邠王於赫文祖基我大梁肇土七十奄有四

方帝軒百祀人思未忘永言聖烈祚我無疆有夏多罪  
殷人塗炭四海倒懸十室思亂自天命我殲凶殄難既  
躍乃飛言登天漢爰饗爰祀福祿攸贊犧象既飾罍俎  
斯具我鬱載馨黃流乃注峩峩卿士駿奔是務佩上鳴  
堦纓還拂樹攸攸億兆天臨日煦猗歟至德光被黔首  
鑄鎔蒼昊甄陶區有肅恭三獻對揚萬壽比屋可封含  
生無咎匪徒七百年長地久有命自天於皇后帝悠悠  
四海莫不來祭繁祉具膺八神聳衛福至有兆慶來無

際播此餘休於彼荒裔祀典昭絜我禮莫違八簋充室  
六龍解駢神宮肅肅靈寢微微嘉薦既饗景福攸歸至  
德光被洪祚載輝

梁太祖太夫人廟樂歌

案隋書樂志曰梁太祖太夫人廟舞歌登歌凡二章  
蕭子雲撰案非嫡故別立廟皇帝每祭太廟訖詣小  
廟亦以一太牢如太廟禮云

舞歌

閔宮肅肅清廟濟濟於穆夫人固天攸啟祚我梁德膺  
斯盛禮文槐達饗重檐丹陛飾我俎彛絜我粢盛躬事  
奠饗推尊盡敬悠悠萬國具承茲慶大孝追遠兆庶攸  
詠

登歌

光流者遠禮貴彌申嘉饗云備盛典必陳追養自本立  
愛惟親皇情乃慕帝服來尊駕齊六轡旂耀三辰感茲  
霜露事彼冬春以斯孝德永被烝民

陳宗廟樂章

陳初詔求宋齊樂奏依太常卿周洪讓議謂齊氏承  
宋咸用元徽舊式于是並用梁樂惟改七室舞辭天  
嘉朝雖有更定俱不著

陳七室舞辭

案隋書樂志曰皇祖步兵府君正員府君懷安府君  
皇高祖安成府君皇曾祖太常府君五室並奏凱容  
舞辭皇祖景皇帝室奏景德凱容舞辭皇考高祖武

皇帝室奏武德舞辭凡七章

皇祖步兵府君室奏凱容

於赫皇祖宮牆高嶷邁彼厥初成茲峻極縵樂簡簡閔  
寢翼翼裸饗若存惟靈靡測

皇祖正員府君室奏凱容

昭哉上德浚彼洪源道光前訓慶流後昆神猷緬邈清  
廟斯存以享以祀惟祖惟尊

皇祖懷安府君室奏凱容

選辰崇饗飾禮嚴敬靡愛牲牢兼馨粢盛明明烈祖龍  
光遠映肇我王風形斯舞詠

皇高祖安成府君室奏凱容

道遙積慶德遠昌基永言祖武致享從思九章停列八  
舞廻埤靈其降止百福來綏

皇曾祖太常府君室奏凱容

肇迹締基義標鴻篆恭惟載德瓊源方闡享薦三清筵  
陳四璉增我堂構式敷帝典



皇祖景皇帝室奏景德凱容

皇祖執德長發其祥顯仁藏用懷道韜光寧斯閔寢合  
此蕭鄉永昭貽厥還符翦商

皇考高祖武皇帝室奏武德

烝哉聖祖撫運升離道周經緯功格元祇方軒邁扈比  
舜凌嫺緝熙是詠欽明在斯雲雷邁屯圖南共舉大定  
揚越威震衡楚四奧宅心九疇還敘景星出翼非雲入  
呂德暢容辭慶昭羽綴於穆清廟載揚徽烈嘉玉既陳

豐盛斯絜是將是享鴻猷無絕

北齊宗廟樂章

齊自天興初廟樂鐘管不備樂章亦闕雜以簸邏迴  
歌大武中有所謂秦漢樂永熙中又有所謂洛陽樂  
至武成時宗廟樂章始定祖珽曾云來自雲朔樂操  
土風者迥不侔矣

北齊享廟樂辭

案隋書樂志曰齊享廟樂辭先祀一日夕牲羣臣入

奏肆夏之樂迎神奏高明登歌之樂牲出入薦毛血  
並奏昭夏之樂三公出進熟羣臣入並奏肆夏與昭  
夏辭同進熟皇帝入北門奏皇夏之樂太祝裸地奏  
登歌之樂皇帝詣東陛及升殿並奏皇夏與進熟辭  
同皇帝升殿殿上作登歌之樂皇帝初獻六世祖司  
空公五世祖吏部尚書高祖秦州刺史曾祖太尉武  
貞公祖文穆皇帝五室並奏始基之樂獻高祖神武  
皇帝室奏武德之樂獻文襄皇帝室奏文德之樂獻

顯祖文宣皇帝室奏文正之樂皇帝還東壁飲福酒  
奏皇夏之樂送神奏高明之樂皇帝詣便殿奏皇夏  
之樂羣臣出奏肆夏辭同凡十八章

夕牲羣臣入奏肆夏

霜淒雨暢烝哉帝心有敬其祀肅事惟歆昭昭車服濟  
濟衣簪鞠躬貢酎磬折奉琛差以五列和以八音式祗  
王度如王如金

迎神奏高明登歌

日卜惟吉辰擇其良奕奕清廟黼黻周張大呂為角應  
鐘為羽路鼗陰竹德歌昭舞祀事孔明百神允穆神心  
乃顧保茲介福

牲出入奏昭夏

大祀云事獻奠有儀既歌既展贊顧迎犧執從伊竦芻  
飾惟慄俟用於庭將升於室且握且駢以致其誠惠我  
貽頌降祉千齡

薦毛血奏昭夏

緬彼遐慨悠然永思留連七享纏綿四時神升魄沉靡  
聞靡見陰陽載俟臭聲兼薦祖考其鑒言萃王休降神  
敷錫百福是由

進熟皇帝入北門奏皇夏

齋居嚴殿夙駕層闐車輅垂彩旒袞騰輝聳誠載仰翹  
心有慕洞洞自形斤斤表步闕宮有邃神道依俦孝心  
緬邈爰屬爰依

太祝裸地奏登歌

太室窅窅神居宿設鬱鬯惟芬珪璋惟絜粢粢應時龍  
蒲代用藉茅無咎福祿攸降端感會事儼思修禮齊齊  
勿勿俄俄濟濟

皇帝升殿殿上奏登歌

我祠我祖永惟厥先炎農肇聖靈祉蟬聯霸圖中造帝  
業方宣道昌基構撫運承天奄家六合爰光八埏尊神  
展禮孝思惟纏寒來暑反惕薦在年匪敬伊慕備物不  
愆設虞設業鞀鼓填填辟公在位有容伊虔登歌啟侑

下管應懸厥容無爽幽明肅然誠而厚地和達穹玄既  
調風雨載協山川周庭有列湯孫永延教聲惟被邁後  
光前

初獻皇祖司空公室奏始基

克明克俊祖武惟昌業洪營土聲被海方有流厥德終  
耀其光明神幽贊景祚攸長

初獻皇祖吏部尚書室奏始基

顯允盛德隆我前構瑤源彌瀉瓊根愈秀誕惟有族丕



緒克茂大業崇新洪基增舊

初獻皇祖秦州使君室奏始基

祖德丕顯明詒知幾豹變東國鵲起西歸禮申官次命  
改朝衣敬思孝享多福無違

獻太祖太尉武貞公室奏始基

兆靈有業潛德無聲韜光戟耀貫幽洞冥道洪舒卷施  
博藏行緬追歲事夜遽不寧

獻皇祖文穆皇帝室奏始基

皇皇祖德穆穆其風語默自己明獻在躬荷天之錫聖  
表克隆高山作矣寶祚其崇離光旦旦載煥載融感薦  
惟永神保無窮

獻高祖神武皇帝室奏武德

天造草昧時難糾紛孰拯斯溺靡救其焚大人利見緯  
武經文顧指維極吐吸風雲開天闢地峻岳夷海冥工  
掩迹上德不宰神心有應龍化無待義征九服仁兵告  
凱上平下成靡或不寧匪王伊帝偶極崇靈享親則孝

絜祀惟誠禮備樂序肅贊神明

獻文襄皇帝室奏文德

聖武丕基獻文顯統眇哉神啟鬱矣天縱道則人洪德  
云邁種昭冥咸敘崇深畢綜自中徂外經朝庇野政反  
淪風威還缺雅旁作穆穆格于上下維享維宗來鑒來  
假

獻顯祖文宣皇帝室奏文正

玄歷已謝蒼靈告期圖璽有屬揖讓惟時龍升獸變洪

我帝基對揚穹昊實啟雍熙欽若皇猷永懷王度欣賞  
斯穆威刑允措軌物俱宣憲章咸布俗無邪指下歸正  
路茫茫九域振以乾綱混通華裔配括天壤作禮視德  
列樂傳響薦祀惟虔衣冠載仰

皇帝還東壁飲福酒奏皇夏

孝心翼翼率禮兢兢時洗時薦或降或升在堂在戶載  
湛載凝多品斯奠備物攸膺蘭芬敬挹玉俎恭承受祭  
之祐如彼岡陵

送神奏高明

仰棖楠慕衣冠禮云罄祀將闡神之駕紛奕奕乘白雲  
無不遘窮昭域極幽塗歸帝祉眷皇都

皇帝詣便殿奏皇夏

禮行斯畢樂奏以終受嘏先退載暢其衷鑒軒循轍麾  
旌復路光景徘徊絃歌顧慕靈之相矣有錫無疆國圖

日鏡家歷天長

鏡一作競

周宗廟樂章

案恭帝平荊州詔制歌辭享宗廟用周武王樂歌夾  
鐘建德朝雅音正定嗣後皆循用無所改作

周宗廟歌辭

案隋書樂志曰周宗廟樂辭皇帝入廟門奏皇夏降  
神奏昭夏俎入皇帝升階獻皇高祖皇曾祖德皇帝  
皇祖太祖文皇帝文宣皇太后閔皇帝明皇帝高祖  
武皇帝七室皇帝還東壁飲福酒還便坐並奏皇夏  
凡十二章庾信撰

皇帝入廟門奏皇夏

肅肅清廟巖巖寢門歌器防滿金人戒言應輦懸鼓崇  
牙樹羽階變升歌庭紛象舞閑安象設緝熙清奠春鮪  
初登新萍先薦僊然入室儼乎其位悽愴履之非寒之  
謂

降神奏昭夏

永惟祖武潛慶靈長龍圖革命鳳歷歸昌功移上塲德  
耀中陽清廟肅肅猛虞煌煌曲高大夏聲和盛唐牲牷

蕩滌蕭合馨香和鑒戾止振鷺來翔永敷萬國是則四方

俎入皇帝升階奏皇夏

年祥辨日上協龜言奉酎承列來庭駿奔雕禾飾竿翠羽承樽敬殫如此恭惟執燔

獻皇高祖奏皇夏

慶緒千重秀鴻源萬里長無時猶戢翼有道故韜光盛德必有後仁義終克昌明星初肇慶大電久呈祥



獻皇曾祖奏皇夏

克昌光上烈基聖穆西藩崇仁高涉渭積德被居原帝  
圖張往迹王業茂前尊重芬德陽廟疊慶壽陵園百靈  
光祖武千年福孝孫

獻皇祖奏皇夏

雄圖屬天造宏畧遇羣飛風雲猶聽命龍躍遂乘機百  
二當天險三分拒樂推函谷風塵散河陽氛霧晞濟弱  
淪風起扶危頽運歸地紐崩還正天樞落更追原祠乍

超忽畢隴或綿微終封三尺劍長卷一戎衣

獻皇太后奏皇夏

月靈興慶沙祥發源功參禹迹德贊堯門言容典禮  
猷徽章儀形溫德令問昭陽日月不居歲時晚晚瑞雲  
纏心闕宮惟遠

獻閔皇帝奏皇夏

龍圖基代德天步屬艱難謳歌還受瑞揖讓乃登壇升  
輿芒刺重入位據闕寒卷舒雲汎濫游揚日浸微出鄭

終無反居桐竟不歸祀夏今惟舊尊靈謚更追

獻明皇帝奏皇夏

若水逢降君窮桑屬惟政丕哉馭帝錄鬱矣當天命方  
定五雲宮先齊八風令文昌氣似珠太史河如鏡南宮  
學已開東觀書還聚文辭金石韻毫翰風颺豎清室桂  
憑憑齊房芝詡詡寧思玉管笛空見靈衣舞

獻高祖武皇帝奏皇夏

南河吐雲氣北斗降星辰百靈咸仰德千年一聖人書

成紫微動律定鳳凰馴六軍命西土甲子陳東隣戎衣  
此一定萬里更無塵烟雲同五色日月並重輪流沙既  
西靜蟠木又東臣凱樂聞朱鴈鏡歌見白麟今為六代  
祀還得九疑賓

皇帝還東壁飲福酒奏皇夏

禮殫裸獻樂極休成長離前挾宗祀文明縮酌浮蘭澄  
疊合鬯磬折禮容旋迴靈貺受釐徹俎飲福移樽惟光  
惟烈文子文孫

皇帝還便坐奏皇夏

庭闕四始筵終三薦顧步階除徘徊餘奠六龍矯首七  
萃警途鼓移行漏風轉相鳥翼翼從事綿綿四時惟神  
降嘏永言保之

周大裕歌

案隋書樂志曰宗廟大裕樂降神奏昭夏奠玉帛奏  
登歌凡二章餘同宗廟時享庾信造


昭夏

律在夾鐘服居蒼袞杳杳清思綿綿長遠就祭於合班  
神於本來庭有序助祭有章樂舞六代賓歌二王和鈴  
以節倬革斯錫齊宮饌玉鬱竿浮金洞庭鐘鼓龍門瑟  
樂已變惟神是臨

登歌

神惟顯思不言而令玉帛之禮敢陳莊敬奉如弗勝薦  
如受命交於神明慙於言行

御製律呂正義後編卷一百二



總校官庶吉士臣張能照  
校對官中書臣馮培

謄錄貢生臣周志禮

欽定四庫全書薈要

子部

御製律呂正義後編卷一百三



詳校官王事臣陳木



欽定四庫全書薈要卷一萬一千三十九

子部

御製律呂正義後編卷一百三

樂章考十一

宗廟

隋

唐





隋宗廟樂章

高祖遣盧思道等列清廟歌辭十二曲達于太樂教  
習以代周歌其初迎神七言象元基曲奠獻登歌六  
言象傾盃曲送神禮畢五言象天行曲但改其聲而  
辭不易仁壽朝謂文多浮麗不足以述宣功德詔虞  
世基等創製後大業中雖欲改作並依舊章惟新造  
高祖廟歌九首今亡佚不傳

隋太廟歌辭

案隋書樂志曰文帝開皇中太廟迎神歌辭登歌辭  
俎入歌辭皇高祖太原府君皇曾祖康王皇祖獻王  
皇考太祖武元皇帝四室歌辭飲福酒歌辭送神歌  
辭其俎入飲福酒與郊丘社廟同凡九章

迎神

務本興教尊神體國霜露感心享祀陳則官聯式序奔  
走在庭几筵結慕裸獻惟誠嘉樂載合神其降止永言  
保之錫以繁祉

登歌

孝熙嚴祖師象敬宗惟皇肅事有來  
雖雖離梁霞復繡  
燎雲重觀德自感奉璋伊恭彝掌盡飾羽綴有容升歌  
發藻景福來從

俎入

祭本用初祀由功舉駿奔咸會供神有序明酌盈樽豐  
犧實俎幽金既薦績錯維旅享由明德香非稷黍載流  
嘉慶克固鴻緒

太原府君神室

締基發祥肇源興慶廼仁廼哲克明克令庸宣國圖善  
流人詠開我皇業七百同盛

康王神室

皇條俊茂帝系靈長豐功疊軌厚利重光福由善積代  
以德彰嚴恭盡禮永錫無疆

獻王神室

盛才必達丕基增舊涉渭同符遷邠等構洪風邁德義

高道富神鑒孔昭王猷克懋

武元皇帝神室

深仁冥著至道潛孚皇矣太祖耀名天衢剪商隆祚奄  
宅隋區有命既集誕開靈符

飲福酒

神道正直祀事有融肅雖備禮莊敬在躬羞燔已具奠  
酌將終降祥惟永受福無窮

送神

享禮具利事成佇旒冕肅簪纓金奏終玉俎徹盡孝敬  
窮嚴絜人祇分哀樂半降景福憑幽贊

唐宗廟樂歌

大唐樂者開元朝釐定樂章總名也史載貞觀六年  
詔褚亮虞世南魏徵等分製樂章開元初則張說奉  
制所作竊攷太常奏請玄宗下制又曰弘農府君至  
大武皇帝六廟貞觀中已詔顏師古等定樂章舞號  
識名撰辭稍有差別大歷元和間各廟添備雅音式



垂令典其餘武韋祭其私親概不採入以崇禋祀云耳

唐太廟樂章

案唐書樂志曰太宗貞觀中享太廟迎神用永和之樂登歌酌鬯用肅和之樂迎俎用雍和之樂皇祖宣簡公酌獻用長發之舞皇祖懿王酌獻辭同太祖景皇帝酌獻用大基之舞世祖元皇帝酌獻用大成之舞高祖大武皇帝酌獻用大明之舞皇帝飲福用壽

和之樂送文舞出迎武舞入用舒和之樂徹俎用雍  
和之樂送神用永和之樂凡十一章其皇帝行用太  
和武舞用凱安二樂辭同冬至圜丘並魏徵褚亮等  
撰

迎神用永和

黃鐘宮三成大呂角二成太簇二成應鐘羽二  
成總九變同用

於穆烈祖洪此丕基永言配命子孫保之百神既洽萬

國在茲是用孝享神其格思

登歌酌鬯用肅和

夾鐘均之黃鐘羽

大哉至德允茲明聖格于上下聿遵誠敬喜樂斯登鳴  
球以詠神其降止式隆景命

迎俎用雍和

崇茲享祀誠敬兼至樂以感靈禮以昭事粢盛咸潔牲  
牲孔備永言孝思庶幾不匱

皇祖宣簡公酌獻用長發

無射宮案唐會要曰貞觀十四年詔用顏師古  
許敬宗議皇祖宣簡公懿王並奏長發之舞取  
詩云濬哲惟商長發其祥也

濬哲維唐長發其祥帝命斯祐王業克昌配天載德就  
日重光本枝百世申錫無疆

太祖景皇帝酌獻用大基

太族宮

猗歟祖業皇矣帝先剪商德厚封唐慶延在姬猶稷方  
晉踰宣基我鼎運於斯萬年

世祖元皇帝酌獻用大成

姑洗宮

周穆王季晉美帝文明明盛德穆穆齊芬藏用四履屈  
道三分鏗鏘鐘石載紀鴻勲

高祖大武皇帝酌獻用大明

韃賓宮案唐會要曰貞觀十四年詔用顏師古

等議高祖廟奏大明之舞取易曰大明終始六位時乘詩大明之篇稱文王有明德也

五紀更運三正遞升勲華既沒禹湯勃興神武命代靈  
睠是膺望雲彰德察緯告徵上紐天維下安地軸徵師  
涿野萬國咸服偃伯靈臺九官允穆殊域委賁懷生介  
福大禮既飾大樂已和黑章擾圉赤宇浮河功宣載籍  
德被詠歌克昌厥後百祿是荷

皇帝飲福用壽和

八音斯奏三獻畢陳寶祚惟永暉光日新

文舞出武舞入用舒和

聖敬通神光七廟靈心薦祚和萬方嚴禋克配鴻基遠  
明德惟馨鳳歷昌

徹俎用雍和

於穆清廟聿修嚴祀四縣載陳三獻斯止籩豆徹薦人  
祗介祉神惟格思錫祚不已

送神用永和

肅肅清祀烝烝孝思薦享昭備虔恭在茲雍歌徹俎祝嘏陳辭用光武志永固鴻基

永徽以後太廟樂章

案唐書樂志曰永徽以後續撰太廟樂章太宗文皇帝酌獻用崇德之舞高宗天皇大帝酌獻用鈞天之舞中宗孝和皇帝酌獻用太和之舞睿宗大聖真皇帝酌獻用景雲之舞皇祖宣皇帝酌獻用光大之舞凡五章



太宗文皇帝酌獻用崇德

永徽元年造

夷則宮

五運改卜千齡啟聖彤雲曉聚黃星夜映葉闡珠囊基  
開玉鏡下臨萬寓上齊七政霧開三象塵清九服海潤  
星暉遠安邇肅天地交泰華夷輯睦翔泳歸仁中外禔  
福績踰黜夏勲高剪商武陳七德刑設三章祥禽巢閣  
仁獸遊梁卜年惟永景福無疆

高宗天皇大帝酌獻用鈞天

光宅元年造

黃鐘宮

承天撫籙纂聖登皇遐清萬寓仰協三光功成日用道  
濟時康璇圖載永寶歷斯昌日月揚輝烟雲爛色河嶽  
修貢神祇效職舜風攸偃堯曦先就睿感通寰孝思浹  
宙奉揚先德虔遵曩狩展義天扃飛英雲岫化逸王表  
神凝帝先乘雲厭俗馭日登元

中宗孝和皇帝酌獻用太和

景雲元年造

太簇宮

廣樂既備嘉薦既新述先惟德孝享惟親七獻具舉五  
齊畢陳錫茲祚福於萬斯春

睿宗大聖真皇帝酌獻用景雲

開元四年造

黃鐘宮

惟睿作聖惟聖登皇精感耀魄時膺會昌舜慙大孝堯  
推讓王能事斯極振古誰方文明履運車書同軌巍巍  
赫赫盡善盡美衢室凝旒大庭端扆釋負之寄事光復  
子脫屣高天登遐上元龍湖超忽象野芊綿遊衣複道

薦果初年新廟奕奕明德配天

皇祖宣皇帝酌獻用光大  
開元十年造

無射宮

大業龍祉徽音駿尊潛居皇德赫嗣天昆展儀宗祖重  
誠孝孫春秋無極享奏存存

舊享太廟樂章

案唐書樂志曰太樂舊有此詞不詳所起迎神金  
奏送神凡三章

迎神

黃鐘宮大呂角太簇徵應鐘羽並同此辭

七廟觀德百靈攸仰俗荷財成物資含養道光執契化  
籠提象肅肅雍雍神其來享

金奏

次迎神

無射宮

肅肅清廟巍巍盛唐配天立極累聖重光樂和管磬禮  
備烝嘗永惟來格福降無疆

送神

五聲備奏三獻終祠車移鳳輦旆轉紅旗禮周邊豆誠效虔祇皇靈徙蹕簪紳拜辭

神龍太廟樂章

案唐書樂志曰中宗神龍元年享太廟迎神用嚴和之樂皇帝行用昇和之樂登歌裸鬯用虔和之樂文舞出武舞入用同和之樂武舞用寧和之樂徹俎用恭和之樂送神用通和之樂登歌奠鬯用

昭和之樂皇后酌獻飲福用誠敬之樂徹俎用肅  
和之樂送神用昭感之樂凡十一章其皇后助享  
皇后行用正和同貞觀中宮朝會辭

迎神用嚴和

黃鐘宮三成大呂角三成太簇徵三成應鐘羽  
二成同用此辭

肅肅清廟赫赫元猷功高萬古化奄十洲中興丕業上  
荷天休祇奉先構禮被懷柔

皇帝行用昇和

黃鐘宮

顧惟菲薄纂歷應期中外同軌夷狄來思樂用崇德禮  
以陳詞夕惕若厲欽奉宏基

登歌裸鬯用虔和

大呂均之無射羽

禮標薦鬯肅事祠庭敬申如在敢托非馨

文舞出武舞入用同和



太族商

惟聖配天敷盛禮惟天為大闡洪名恭禮展敬光先德  
蘋藻申虔表至誠

武舞用寧和

林鐘徵

災馭失天綱

一作王綱

土德承天命英猷被寰宇懿躅隆邦

政七德已綏邊九夷咸底定景化覃遐邇深仁洽翔泳

徹俎用恭和

大呂均之無射羽

禮周三獻樂闋九成肅承靈福悚惕兼盈

送神用通和

黃鐘宮

祠容既畢仙座爰興停停鳳舉藹藹雲昇長隆寶運永  
錫休徵福覃貽厥恩被黎蒸

登歌奠鬯用昭和

大呂均之無射羽

道洽二儀交泰時休四寓和平環珮肅于庭實鐘石揚  
乎頌聲

皇后酌獻飲福用誠敬

黃鐘宮

顧惟菲質忝位椒宮虔奉蘋藻肅事神宗敢申誠潔庶  
罄深衷辟容有裕靈享無窮

徹俎用肅和

大呂均之無射羽

月禮已周雲和將變爰獻其醑載遷其奠明德逾隆非  
馨是薦澤霑動植仁覃寓縣

送神用昭感

黃鐘羽

鏗鏘韶濩肅穆神容洪規赫赫祠典雍雍已周三獻將  
乘六龍虔誠有托懇志無從

開元太廟樂章

案唐書樂志曰玄宗開元七年享太廟樂章迎神

用永和之樂皇帝行用太和之樂登歌酌瓚用肅  
和之樂迎俎用雍和之樂皇帝酌醴齊用文舞闕  
名獻祖宣皇帝室奠獻用光大之舞懿祖光皇帝  
室奠獻用長發之舞太祖景皇帝室奠獻用大政  
之舞代祖元皇帝室奠獻用大成之舞高祖神堯  
皇帝室奠獻用大明之舞太宗文武聖皇帝室奠  
獻用崇德之舞高祖天皇大帝室奠獻用鈞天之  
舞中宗孝和皇帝室奠獻用太和之舞睿宗大聖

皇帝室奠獻用景雲之舞凡十七章張說撰

迎神用永和三章

肅九室諧八音歌皇慕動神心禮宿設樂妙尋聲明備  
裸奠臨

律迓氣音入元振玉几御黼筵聆愜息優周旋九韶遍  
百福傳

信工祝永頌聲來祖考聽和平相百辟貢九瀛神休委  
帝孝成

皇帝行用太和

時文聖后清廟肅邕致誠勤薦在貌思恭玉節肆夏金  
鏘五鐘繩繩雲步穆穆天容

登歌酌瓚用肅和

天子孝享工歌溥將躬灌鬱鬯乃焚膋薌臭以達陰聲  
以求陽奉時蒸嘗永代不忘

迎俎用雍和 二章

在滌嘉泰麗碑敬牲角握之牝色純之駢火傳陽燧水

既陰精太公胖俎傳說和羹

俎豆有馥齊盛潔豐亦有和羹既戒既平鼓鐘管磬肅  
唱和鳴皇皇后祖賚我思成

皇帝酌醴齊用文舞

闕曲名

聖謨九德真言五千慶集昌曹符開帝先高文杖鉞克  
配彼天三宗握鏡六合煥然帝其承祀率禮罔愆圖書  
霧出日月清懸舞形德類詠諡功傳黃龍蜿蜒彩雲蹕  
躡五行氣順八佾風宣介此百祿於皇萬年



獻祖宣皇帝室奠獻用光大

肅肅藝祖滔滔濬源有雄王劍作鎮金門元王貽緒后  
稷謀孫肇禋九廟四海來尊

懿祖光皇帝室奠獻用長發

具禮崇德備樂承風魏推幢主周贈司空不行而至無  
成有終神興王業天歸帝功

太祖景皇帝室奠獻用大政

於赫元命權輿帝文天齊八柱地半三分宗廟觀德笙

鏞樂勲封唐之兆成天下君

代祖元皇帝室奠獻用大成

帝舞李歷襲聖生昌后歌有螭胎炎孕黃天地合德日月齊光肅雍孝享祚我萬方

高祖神堯皇帝室奠獻用大明

赤精亂德四海困窮黃旗義舉三靈會同早望春雨雲披大風溥天來祭高祖之功

太宗文武聖皇帝室奠獻用宗德

皇合一德朝宗百神削平天地大拯生人上帝配食單  
于入臣戎歌陳舞曄曄震震

高宗天皇大帝室奠獻用鈞天

高皇邁邁道端拱無為化懷獫鬻兵賦勾驪禮尊封禪樂  
盛來儀合位媯后同稱伏羲

中宗孝和皇帝室奠獻用太和

退居江水鬱起丹陵禮物還舊朝章中興龍圖友及駿  
命恭膺鳴球香瓚大禧是承

睿宗大聖皇帝室奠獻用景雲

景雲霏爛告我帝符噫帝冲德與天為徒笙鏞遙遠俎  
豆虛無春秋孝獻迴復此都

寶應以後太廟樂章

案唐書樂志曰代宗寶應以後續造享太廟樂章  
玄宗至道大聖大明孝皇帝室奠獻用廣運之舞  
肅宗文明武德大聖大宣孝皇帝室奠獻用維新  
之舞代宗睿文孝武皇帝室奠獻用保大之舞德

宗神武孝文皇帝室奠獻用文明之舞順宗至德  
大聖大安孝皇帝室奠獻用大順之舞憲宗聖神  
章武孝皇帝室奠獻用象德之舞皇帝飲福受胙  
用福和之樂送文舞出迎武舞入用舒和之樂亞  
獻終獻行事武舞用凱安之樂徹豆登歌送神用  
永和之樂凡一十四章郭子儀等撰又案郭茂倩  
樂府並載穆宗用和寧之舞武宗用大定之舞昭  
宗用咸寧之舞宣宗懿宗有舞辭而其名不傳凡

五章今俱採入備考

玄宗孝皇帝室奠獻用廣運

郭子儀撰

於赫皇祖昭明有融惟文之德惟武之功河海靜謐車  
書混同虔恭孝享穆穆玄風

肅宗孝皇帝室奠獻用維新

劉晏撰

漢祚惟永神功中興風驅氛祲天覆黎烝三光再朗庶  
績其凝重熙累葉景命是膺

代宗孝武皇帝室奠獻用保大

郭子儀撰

於穆文考聖神昭彰簫勺羣慝含光遠方萬物茂遂九  
夷賓王惜惜雲韶德音不忘

德宗孝文皇帝室奠獻用文明

鄭餘慶撰

開卽除暴時邁勛尊三元告命四極駿奔金枝翠葉輝  
燭瑤琨象德億載貽慶湯孫

順宗孝皇帝室奠獻用大順

鄭絀撰

於穆時文受天明命允恭玄默化成理定出震嗣德應  
乾傳聖猗歟緝熙千億流慶

憲宗孝皇帝室奠獻用象德

段文昌撰

肅肅清廟登顯至德澤周八荒兵定四極生物咸遂羣  
盜滅息明聖欽承子孫千億

皇帝飲福受昨用福和

備禮用樂崇親致尊誠通慈降敬徹愛存獻懷稱壽  
感承恩皇帝孝德子孫千億大包天域長亘不極

文舞出武舞入用舒和

六鐘翕協六變成八佾徜徉八風生樂九韶兮人神感



美七德兮天地清

亞終獻行事武舞用凱安

四章

瑟彼瑤爵亞維上公室如屏氣門不容躬禮殷其本樂  
執其中聖皇永慕天地緇通

禮匝三獻樂遍九成降階軒陛仰歆皇情福與仁合德  
因孝明百年神畏四海風行

總總千戚填填鼓鐘奮揚增氣坐作為容離若鷙鳥合  
如戰龍萬方觀德肅肅邕邕

烈祖順三靈文宗威四海黃鉞誅羣盜朱旗掃多罪戢  
兵天下安約法人心改大哉千羽意長見風雲在

徹豆登歌

曲名闕

止笙磬徹豆邊廓無響窅入玄主在室神在天情餘慕  
禮罔愆喜黍稷屢豐年

送神用永和

眇嘉樂授靈爽感若來思如往休氣散迴風上返寂寞  
還惚恍懷靈駕結空想

穆宗用和寧

牛僧孺撰

湜湜頎頎融昭德輝不紐不舒貫成九圍武烈文經敷  
施當宜纂堯付啓億萬熙熙

武宗用大定

李回撰

受天明命敷祐下土化時以儉衛文以武氛消夷夏俗  
臻往古億萬斯年形于律呂

宣宗

有辭闕名夏侯孜撰

於鑠令主聖祚重昌興起教義申明典章俗尚素樸人

皆樂康積德可報流慶無疆

懿宗

有辭闕名蕭倣撰

聖祚無疆慶傳樂章金枝繁茂玉葉延長海瀆常晏波  
濤不揚汪汪美化垂範今王

昭宗用咸寧

撰者闕名

於鑠丕嗣惟帝之光羽籥象德金石薦祥聖系無極景  
命永昌神降上哲維天配長

唐儀坤廟樂章

案唐書樂志曰儀坤廟迎神用永和之樂次金奏皇  
帝行用太和之樂酌獻登歌用肅和之樂迎俎用雍  
和之樂肅明皇后室酌獻用昭升之舞昭成皇后室  
酌獻用坤貞之舞飲福用壽和之樂送文舞出迎武  
舞入用舒和之樂武舞用安和之樂徹俎用雍和之  
樂送神用永和之樂凡十二章徐彥伯等撰

迎神用永和

徐彥伯撰

### 林鐘宮

猗若清廟肅肅熒熒國薦嚴祀坤興淑靈有乂在室有  
樂在庭臨茲孝享百祿惟寧

金奏 撰者闕名

夷則宮

陰靈効祉軒耀降精祥符淑氣慶集柔明瑤俎既列雕  
桐發聲徽猷永遠比德皇英

皇帝行用太和 丘說撰

黃鐘宮

孝哉我后冲乎乃聖道映重華德輝文命慕深視篋情  
殷撫鏡萬國移風兆人承慶

酌獻登歌用肅和

張齊賢撰

仲呂均之太簇又側注曰一云蕤賓均之夾鐘

羽

祿圭既濯鬱鬯既陳畫綦雲舉黃流玉醇儀充獻酌禮  
盛衆禋地察惟孝愉焉饗食親

迎俎用雍和

鄭善玉撰

姑洗羽

酌鬱既灌取蕭方藝籩豆靜嘉簋簋芬飴魚腊薦美牲  
拊表潔是戢是將載迎載列

肅明皇后室酌獻用昭升

薛稷撰

林鐘宮

陽靈配德陰魄昭升堯壇鳳下漢宗龍興  
覩天作對前  
旒是凝化行南國道盛西陵造舟集濯無德而稱我粢  
既潔我醴既澄陰陰靈廟光靈若憑德馨惟饗孝思烝



烝

昭成皇后室酌獻用坤貞

撰者闕名

乾道既亨坤元以貞肅雍攸在輔佐斯成外睦九族內  
光一庭克生睿哲祚我休明欽若徽範悠哉淑靈建茲  
清宮于彼上京縮茅以獻潔粢惟馨實受其福期予億  
齡

飲福用壽和

徐堅撰

黃鐘宮

於穆清廟肅雍嚴祀合福受釐介以繁祉

文舞出武舞入用舒和

胡雄撰

南呂商

送文迎武遞參差一始一終光聖儀四海生人歌有慶  
千齡孝享肅無虧

武舞用安和

劉子玄撰

太簇徵

妙算申帷幄神謀出廟庭兩階文物備七德武功成校

獵長楊苑屯軍細柳營將軍獻凱入歌舞溢重城

徹俎用雍和

員半千撰

蕤賓均之夾鐘羽

孝享云畢維徹有章雲感玄羽風悽素商瞻望神座祇  
戀匪遑禮終樂闋肅雍鏘鏘

送神用永和

祝欽明撰

林鐘宮

闕宮實實清廟微微降格無象馨香有依式昭纂度方

融嗣徽明禋是享神保聿歸

又儀坤廟樂章

案唐書樂志曰太樂又有儀坤廟樂章迎神送神  
凡二章餘與前同

迎神

月靈降德神元授光娥英比秀姪姒均芳瑤臺薦祉金  
屋延祥迎神有樂歆此嘉鄉

送神

玉帛儀大金絲奏廣靈應有孚冥徵不爽降彼休福歆  
茲禋享送樂有章神麾其上

昭德皇后廟樂章

案唐書樂志曰昭德皇后室迎神用永和之樂登  
歌酌鬯用肅和之樂迎俎用雍和之樂酌獻用坤  
元之樂送文舞出迎武舞入用舒和之樂武舞用  
凱安之樂徹俎用雍和之樂送神用永和之樂其  
飲福用壽和之樂史闕今採郭茂倩樂府補入凡

九章其辭內出

迎神用永和

穆清廟薦嚴禋昭禮備和樂新望靈光集元辰祚無極  
享萬春

登歌酌鬯用肅和

誠心達娛樂分升蕭管鬱氛氲茅既縮鬯既薰  
福如雲

迎俎用雍和

我將我享盡明而誠載芬黍稷載滌犧牲懿矣元良萬  
邦以貞心乎愛敬若覩容聲

酌獻用坤元

於穆先后儷聖稱崇母臨萬寓道被六宮昌時協慶理  
內成功殷薦明德傳芳國風

飲福用壽和

工祝致告徽音不遐酒醴咸旨馨香具嘉受釐獻祉永  
慶邦家

文舞出武舞入用舒和

金枝羽部輟清歌  
瑤堂肅穆笙磬羅諧音  
遍響合明意  
萬類昭融靈應多

武舞用凱安

辰位列四星帝功參十亂  
退賢勤內輔  
扈蹕清多難承  
天厚載均並曜  
霄光燦留徽邁前躅  
萬古披圖煥  
徹俎用雍和

公尸既起享禮載終  
祠歌進徹盡敬由衷  
澤流惠下大



小咸同

送神用永和

昭事終幽享餘移月御返仙居璇庭寂靈帷虛顧徘徊  
感皇儲

唐讓皇帝廟樂章

案讓皇帝廟樂章史不載今從郭茂倩樂府採入迎  
神奠幣迎俎酌獻亞終獻送神凡六章李舒撰

迎神

皇矣天宗德先王季因心則友克讓以位爰命有司式  
遵前志神其降靈昭饗祀事

奠幣

惟帝時若去而上仙祀用商武樂備宮懸白璧加薦玄  
纁告虔子孫拜後承茲吉蠲

迎俎

祀盛體薦禮協粢盛方周假廟用魯純牲捧徹祇敬擊  
拊和鳴受釐歸昨既戒而平

酌獻

八音具舉三壽既盥潔茲宗彝瑟彼圭瓚蘭肴重錯椒  
醑飄散降祚維城永為藩翰

亞終獻

秩禮有序和音既同九儀不忒三揖將終孝感藩后相  
維辟公四時之典永永不窮

送神

奠獻已事昏昕載分風搖雨散靈衛綢繡龍駕帝服上

騰五雲泮宮復閤寂寞無聞

唐隱太子廟樂章

案唐書樂志曰太宗貞觀中享隱太子廟迎神用誠  
和之樂送神辭同登歌奠玉帛用肅和之樂迎俎用  
雍和之樂送文舞出迎武舞入用舒和之樂武舞用  
凱安之樂凡五章

迎神用誠和

道閤鶴闕運纏鳩里門集大命俾歆嘉祀禮亞六瑚誠

殫二簋有誠顯若神斯戾止

登歌奠玉帛用肅和

歲肇春宗乾開震長瑤山既寂戾園斯享王肅其事物  
昭其象絃誦成風笙歌合響

迎俎用雍和

明典肅陳神居邃啓春伯聯事秋官相禮有來雍雍登  
歌濟濟緬惟主鬯庶歆芳醴

文舞出武舞入用舒和

三縣已判歌鐘列八佾將開羽鉞分尚想燕飛來蔽日  
終疑鶴影降凌雲

武舞用凱安

天步昔將開商郊初欲踐撫戎金陣廓貳極瑤圖闡雞  
戟遂崇儀龍樓期好善美兵墮震業啓聖隆祠典

又隱太子廟樂章

案唐書樂志曰太樂舊有隱太子廟迎神送神辭  
凡二章不詳所起

迎神

蒼震有位黃離蔽明江充禍結戾據災成銜怨昔痛贈  
典今榮享靈有秩奉樂以迎

送神

皇情悼往祀儀增設鐘鼓鏗鏘羽旄昭晰掌禮云備司  
筵告徹樂以送神靈其鑒閔

章懷太子廟樂章

案唐書樂志曰神龍初享章懷太子廟迎神第一

登歌酌鬯第二迎俎酌獻第三送文舞出迎武舞  
入第四武舞作第五送神第六辭同隱廟凡五章  
迎神

姑洗

副君昭象道應黃離銅樓備德玉裕成規仙氣靄靄靈  
從師師前驅戾止控鶴來儀

登歌酌鬯

南呂均之蕤賓羽



忠孝本著羽翼先成寢門昭德馳道為程幣帛有典容  
衛無聲司存既肅廟享惟清

迎俎酌獻

大呂羽

通三錫胤明兩承英太山比赫伊水聞笙宗祧是寄禮  
樂其亨嘉辰薦俎以發聲明

文舞出武舞入

蕤賓商

羽籥崇文禮以畢干鉞奮武事將行用捨由來其有致  
壯志宣威樂太平

武舞作

夷則角

綠林熾炎歷黃虞格有苗沙塵驚塞外帷幄命嫖姚七  
德干戈止三邊雲霧消寶祚長無極歌舞盛今朝

懿德太子廟樂章

案唐書樂志曰神龍初享懿德太子廟迎神第一

登歌酌鬯第二迎俎酌獻第三送文舞迎武舞第四武舞作第五送神第六辭同隱廟凡五章

迎神

姑洗宮

甲觀昭祥畫堂升位禮絕羣后望尊儲貳啓誦慚德壯  
丕掩粹伊浦鳳翔維峰鶴至

登歌酌鬯

南宮均之蕤賓羽

譽闡元儲寄崇明兩玉裕雖晦銅樓可想絃誦輟音笙  
歌罷響幣帛言設禮容無爽

迎俎酌獻

大呂羽

雍雍盛典肅肅靈祠賓天有聖對日無期飄飄羽服掣  
曳雲旗眷言主鬯心乎愴茲

送文舞迎武舞

蕤賓商

八音協奏陳金石六佾分行整禮容滄溟赴海還稱少  
素月開輪即是重

武舞作

夷則角

隋季昔云終唐年初啓聖纂戎將禁暴崇儒更敷政威  
略靜三邊仁恩覃萬姓

節愍太子廟樂章

案唐書樂志曰景雲中享節愍太子廟迎神第一

登歌酌鬯第二迎俎酌獻第三送文舞迎武舞第  
四武舞作第五送神第六辭同隱廟凡五章

迎神

姑洗宮

儲后望崇元良寄切寢門是仰馳道不絕仙袂雲會靈  
旗電晰煌煌而來禮物攸設

登歌酌鬯

南呂均之蕤賓

灼灼重明仰承元首既賢且哲惟孝與友惟孝雖遙靈  
規不朽禮因誠致備絜元酒

迎俎酌獻

大呂羽

嘉薦有典至誠莫騫畫梁雲亘雕俎星聯樂器周列禮  
容備宣依稀如在若未賓天

送文舞迎武舞

蕤賓商

邕邕闡化憑文德赫赫宣威藉武功既執羽旄先拂吹  
還持玉鉞更揮空

武舞作

夷則角

武德諒雄雄由來掃寇戎劒光揮作電旗影列成虹霧  
廓三邊靜波澄四海同睿圖今已盛相共舞皇風  
文恭太子廟樂章

案文恭太子廟樂章史不載今從郭茂倩樂府採



入請神登歌迎俎酌獻退文舞迎武舞亞終獻送  
神凡六章許孟容陳京等撰

請神許孟容撰

觴牢具品磬管有節祝道寅恭神儀昭晰桐珪早貴象  
輅追設磬達樂成降歆豐潔

登歌陳京撰

歌以德發聲以樂貴樂善名存追仙禮異鸞旌拱修鳳  
鳴合次神聽皇慈仲月皆至

迎俎酌獻

馮伉撰

撰日瞻景誠陳樂張禮容秩秩羽舞煌煌肅將滌濯祇薦芬芳永錫繁祉思深享嘗

退文舞迎武舞

撰者闕名

千旄羽籥相虧蔽一進一退殊行綴昔獻三雍盛禮容今陳六佾崇儀制

亞終獻

崔邠撰

醴齊泛罇彝軒縣動干戚入室儼如在升階處所暨奮

疾合威容定利舒皦繹方崇廟貌禮永被君恩錫

送神

張薦撰

三獻具舉九旗將旋追勞表德罷享宵天風引仙管堂  
虛畫筵芳馨常在瞻望悠然

惠昭太子廟樂章

案惠昭太子廟樂章史不載今從郭茂倩樂府採  
入請神登歌迎俎酌獻退文舞迎武舞亞終獻送  
神凡六章歸登杜羔等撰

請神

歸登撰

嘉薦既陳祀事孔明間歌在堂萬舞在庭外則盡物內則盡誠鳳笙如聞歆其潔精

登歌

杜羔撰

因心克孝位震遺芬賓天道茂軫懷氣分發祇乃祀咳歎如聞二歌斯升以詠德薰

迎俎酌獻

李逢吉撰

既潔酒醴聿陳熟腥肅將震念昭格儲靈展矣禮典薰

然德馨悃悃管磬亦具是聽

退文舞迎武舞

孟簡撰

喧喧金石容既缺肅肅羽駕就行列緹山遺響昔所聞  
廟庭進旅今攸設

亞終獻

裴度撰

重輪始發祥齒胄方興學冥然紫府升鏗爾薦清樂奠  
聿致馨香在庭紛羽籥禮成神既醉髣髴緹山鶴

送神

王涯撰

威儀畢陳備樂將闕芑茅酒縮管蕭香徹官臣展事肅  
雍在列迎精送往厥鑒昭晰

唐太清宮樂章

案唐書禮儀志曰玄宗開元二十年正月詔兩京諸  
州置玄元廟天寶二年三月以西京玄元廟為太清  
宮其樂章降仙聖奏煌煌發爐奏冲和上香畢奏紫  
極舞序入破三奏撤醺奏登歌送仙聖奏真和凡十  
一章案唐以老子為玄元皇帝故其樂章附於唐宗

廟樂之末撰者未詳

降仙聖奏煌煌

煌煌道宮肅肅太清禮光尊祖樂備充庭罄竭誠至希  
夷降靈雲凝翠蓋風燄紅旌衆真以從九奏初迎永惟  
休祐是錫和平

發爐奏冲和

虛無結想鐘磬和音歌以頌德音以達心禮殊祿乞義  
感昭臨雲車至止慶垂愔愔

香初上

肅肅我祖繇繇道宗至感潛達靈心暗通雲駢御氣芝  
蓋隨風四時禋祀萬國來同

再上

仙宗績道我李承天慶深虛極符光象先俗登仁壽化  
闡壇涓五千貽範億萬斯年

終上

不宰元功無為上聖洪源長發誕受天命金奏迎真璇



宮展盛備禮周樂垂光儲慶

紫極舞

至道生元氣重圓法混成無為觀大象冲用體常名仙  
樂臨丹闕雲車出玉京靈符百代應瑞節九真迎寶運  
開皇極天臨映太清長垂一德慶永此萬方寧

序入破第一奏

真宗開妙理冲教統清虛化演無為日言昭有象初瑤  
壇肅靈瑞金闕映仙居一奏三清樂長回八景輿

第二奏

虛極仙宗本希夷象帝先百靈朝太上萬法祖重圓善  
貸惟冲德功成謂自然雲門達和氣思用合鈞天

第三奏

元符傳紫極寶祚啓高真道德先垂裕冲和已化淳人  
風齊太古天瑞叶惟新仙樂清都上長明交泰辰

徹醮奏登歌

嚴禋展事禮潔蒸嘗皇矣聖祖德惟馨香盛薦既徹歌

工再揚大來之慶降福穰穰

送仙聖奏真和

玉磬含響金鑪既馥風馭泠泠雲壇肅肅杳歸大象霈  
流嘉福俾寧萬邦無思不服

唐德明興聖廟樂章

案唐書禮儀志曰玄宗天寶二年三月追尊臯繇為  
德明皇帝涼武昭王為興聖皇帝其廟樂第一迎神  
第二登歌奠幣第三迎俎第四酌獻第五亞獻終獻

第六送神凡七章李舒撰

迎神

元尊九德佐堯光宅烈祖太宗方周作伯響懷霜露樂  
變金石白雲清風髣髴來格

登歌奠幣

四時有典百事來祭尊祖奉宗嚴禋大帝禮先蒼璧奠  
備玄制於萬斯年熙成帝系

迎俎

盛牲實俎涓選休成鼎燂陽燧玉盥陰精有嘉豆既  
和大羹侑以清樂細齊人情

德明神室酌獻

清廟奕奕和樂雍雍器尊犧象禮屬宗公白水方裸黃  
流在中謨明之德萬古清風

興聖神室酌獻

閔宮靜謐合樂周張泰尊始獻百末重觴震澹存誠庶  
幾迪嘗遙源之祚天漢靈長


亞終獻

惟清惟肅靡聞靡見舉備九成俛終三獻慶彰曼壽昨  
撤嘉薦瘞玉埋牲禮神斯徧

送神

元精回復靈貺繁滋風灑蘭路雲搖桂旗高丘緬邈涼  
部逶迤瞻望靡及纏綿永思

御製律呂正義後編卷一百三



總校官庶吉士臣張能照

校對官中書臣馮培

謄錄監生臣張孝基